

Porro Non Vegetabilia Corpora aliorum respectu hic pauca occurrunt, & ut plurimum Vegetabilia ante fuerunt, sed resecta vel impedita vegetationem suam interea amittere, quorum Natura nil fere peculiare habet à Vegetabilibus, sed priuatione potius ex Vegetabilium natura cognita determinatur.

Initio ergo de simpliciter Vegetabilibus hæc habeantur.
Vegetationis natura & causæ.

Materia illius seu nutrimentum, quod non primario vel Terram vel Liquorem, vel aliud quoduis vulgo dictum corpus, vel rem vllam hæctenus cognitam, sed longe quid diuersum & hucusq; latens esse docebimus.

Rerum Fossilium, quæ vel terra plane conteguntur, vel ex terra erumpunt & extant, vel circumscriptione libera in superficie terræ se produnt, distinctiones & species.

Quæ item res, præter iam dictas, sub vasta Terræ mole interius latere nec vnq; in lucem prodire æstimandæ veniant.

Quomodo Lapides ipsi, Metalla & Corpora alia quæ non Vegetabilia perhibentur, non secus ac plantæ ipsæ vegetentur, virtute interius perfusa crescant & speciem conseruent: non raro etiam figuris & speciebus certis animalium, plantarum & aliarum rerum insigniantur.

Quam Speciei conseruationem Corporibus regulariter omnibus, etiam arenis, pulueribus, terris, liquoribus etc. tribuimus: nisi vbi Monstra seu noua quædam & peculiaria fiunt, quæ tamen si modo fere simili contingant sæpius, Speciem sibi præbent.

Hæc Monstra non tantum in Animalium & Plantarum, sed passim in omni rerum genere se exhibent.

Cuius deuiationis causas & naturas varias indicabimus.

Vnde item alias contingant rerum huiusmodi immutationes, & vnus in aliud corpus transformationes.

Metalla non ex Sulphure & ☿, vel alio corpore consimili & materiam acquirere, nec inde formari.

Necq; Ignis siue Caloris seu externi seu ingeniti virtute (ut nec Vegetabilia vlla) perfici.

Herbaum, Fruticum, Arborum propria.

Qui Plantæ nunc ex Radice, nunc ex Stipite, nunc ex Semine fiant & propagentur. Qui etiam sine præcedentis plantæ vllius reliquijs aut vestigijs vllis Plantæ omnis generis & primitus genitæ sint, & etiamnum generentur.

Cur Plantæ immediatæ Terræ suæ adhæreant.

Qui